



天津交通銀行同  
人俱樂部圖書室



永順奸匪撲城擒斬要犯首逆畏罪自盡摺

咸豐五年正月  
月初七日

奏爲永順奸匪嘯聚攻撲府城經官兵擊退擒斬要犯多名首逆畏罪自盡見在搜剿餘匪恭摺奏祈

聖鑒事竊湖南永順一府地方自雍正年間改土歸流蒙業相安多歷年所永順桑植兩縣交界之泥湖塔塔臥堡兩處近因痞匪藉練團爲名往往恃眾抗官尋釁滋鬧上年七月間桑植縣民李老錘等聚眾闖入縣城將前年計典被參去任之知縣李朝賡毆傷致命之偏右右脅脊背三處及不致命之右胳膊等處因傷重行至澧州永定縣斃命當經飭提聚眾滋鬧首先截傷李革令之犯李老錘解省審辦并飭府縣搜拏餘黨十一月二十日革生彭

駱文忠奏稿卷二

一

蓋南在塔臥堡一帶潛糾痞棍吳和尚塗正路瞿三遠等乘署永順縣知縣孫翹澤在王村公榦未回突入府城搶掠府縣經歷衙署署永順府知府黃其表會同永順協副將愛紳帶兵役驅拏旋即四散彭蓋南等揚言大兵不日進剿須爲死裏求生之計塔臥堡內外龍堡顆沙堡及桑植之泥湖塔等處愚民多被煽惑彭蓋南遂自稱珍明王詭託土司後裔多署僞官迫脅鄉民聲言仍復土司故業二十三日率眾攻城焚燒城外民房火光燭天監犯莊世棟熊良柱張黃岡譚松兒瞿德成汪洪太乘變逸出二十四日黃其表愛紳商派永順協都司蔣培基開城擊賊槍斃執旂賊目宋廷弼及匪黨十餘名賊勢稍卻蔣培基收隊回城失足落河淹

斃是日署永順縣知縣孫翹澤由王村帶勇四百名回城署保靖營參將任經元帶保靖兵三百名署保靖縣知縣張淮飭其子監生張士傑從九職銜羅淦屯外委羅應瓊募帶鄉勇二百名亦先後踵至守禦益固首逆彭蓋南同僞軍師宋朝武僞元帥瞿三遠塗正路等盤踞多男山二十九日首逆彭蓋南等復糾眾圍撲府城城上礮石雨下斃賊多名任經元張士傑督帶兵勇出城攻剿賊眾望風而靡任經元帶兵衝擊生擒僞先鋒吳和尚僞副元帥塗正興等三十餘名追斬百餘名奪獲槍礮刀矛數十件餘匪退踞弔雞巖護辰沅永靖兵備道瞿聞警卽調募漢土兵勇一千四百名親自督帶馳赴保靖縣相機援剿逆目塗正路瞿三遠等赴各鄉村偪脅良民入夥鄉民知官軍四集賊勢已衰列崗岡土民卽將瞿三遠網送府城正法塗正路行至亂田溝亦被土民誘殺獻屍請驗首逆彭蓋南見人心不附同謀各犯多被擒斬又偵知漢土兵勇已齊抵府城震懼失措遂自縊死僞軍師宋朝武欲自爲解脫之計負屍請功署永順府知府黃其表署永順縣知縣孫翹澤驗明後剉屍梟示并將宋朝武拘禁一面飛稟止調各路官兵以節糜費臣前接該府縣稟報賊匪滋事時卽札委護辰沅永靖兵備道瞿誥統帶各路兵勇親臨督辦復因武職委用乏人查有常澧失守案內之已革都司宋廣東技藝尙優已革前署澧州參將張昕人尙明白飭令帶官兵三百八十名馳赴永定縣邊

界防賊匪下竄常澧之路一面相機協剿并諭知該革員等儻再不知奮勉立功卽當請

旨軍前正法復調把總張萬書外委鄒明英管帶健勇二百六十名馳赴保靖縣均聽瞿誥調遣一面飭九谿營遊擊侯鳳岐備兵聽調見據瞿誥稟報該員行抵永順府城卽監提僞軍師宋朝武正法探知首逆彭蓋南之義子吳廷有仍踞多男山而黃山坡劉家寨冷水澤溪大莊九關坪白蛇溪等處餘匪嘯聚尙各數百人永順府與湖北之施南府四川之酉陽州本省之辰州常德澧州各屬壤地毗連巖壑深險逼近苗疆尙有紅匪黑匪出沒其間此次倡亂首從各犯雖擒斬網獻多名而餘黨竄伏山谷者實繁有

駱文忠奏稿卷二

三

徒且桑植滋事匪徒尙多未獲若官軍遽撤必至死灰復然見在相機搜剿以絕根株臣前次接據該府協稟請止調官軍之時卽批飭其非仍札催該護道瞿誥督帶兵勇前進妥速剿辦該護道所見適相符合蓋該處匪徒見時局紛紜本省調發頻煩不遑啟處竊意大兵不能分剿故敢妄肆鳴張臨之以重兵迫之以網獻或可期罪人斯得餘孽銷除免致重煩兵力辦理情形容俟隨時馳報所有永順滋事及首要各犯旋即擒斬自盡見在籌辦緣由謹據實具奏伏乞

聖鑒訓示施行謹 奏

硃批剿辦情形續行奏聞欽此

粵賊竄陷江藍廳城旋即收復片

咸豐五年正月  
初七日

再十月十二日廣西清水賊匪勾結廣東連州賊匪三千餘人由黃竹寨竄逼江藍廳城時廳城存兵無多署守備賀炳胡往梅子岡一帶招募壯勇未回署江藍廳同知卽補通判顏培勳飛調團丁嬰城固守該匪分三股撲城顏培勳飭放守城大礮賊稍卻退旋踞城外之福至嶺俯瞰城中顏培勳急飭團丁出城徑撲賊營不防另股賊匪潛從東北角梯入城內百姓急扶顏培勳開南門出城退至城外五里鋪團丁羣集適署江華縣知縣任立誠撥練勇二百名飛馳前來卽就地紮營賊分股攻撲均經擊退客商候選未入單永清客民張兆燮趙維俊鄒慶齡封國賢馮世昌捐資

駱文忠奏稿卷二

四

共募鄉勇六百名隨同剿賊顏培勳於十四日率壯勇奪踞福至嶺開礮向城轟擊團紳汪際唐率團丁繼至賊以官軍四集棄城狂竄顏培勳卽率單永清汪際唐等跟蹤緊追至黃竹寨始行收隊沿途轟斃賊匪五十名擊斬百餘名生擒僞先鋒陳老五僞軍師何亞滿及龔一郎唐三唐亞興鍾鐵三關亞會等十一名奪獲洪順堂紅緞大旂一面隨將廳城收復十二月初六日廣東賊匪復由毛氏塘竄至橫江分股竄往沂村顏培勳當調團丁六百名派兵五十名飭署黃竹寨汛額外六品軍功劉貴署高村汛額外韋鵬飛管帶先期沂村之賊另募壯勇三百名分紮城中是日已刻橫江之匪竄至南門對河之大柳屯旋撲城垣顏培勳督率兵

勇登陣守禦槍礮齊施轟斃賊匪數十人適沂村之賊見兵勇大  
至旋卽遁走韋鵬飛劉貴追至大竹圍斃賊八名轟斃十數名途  
間聞橫江之賊偪近廳城礮聲甚緊遂折回夾擊甫至大柳屯顏  
培肅在城上望見遂激勵兵勇由南門衝殺出城賊遂卻退韋鵬  
飛劉貴督兵勇追擊斃賊五十餘名奪獲小槍刀矛令旂等件劉  
貴注意騎馬賊目奮勇直撲適馬蹶忽蹶該匪翻身轉鬪遂至被  
戕殞命顏培肅韋鵬飛合兵追逐至楚粵交界之西嶺地方始行  
收隊查點兵勇陣亡團丁九名此江藍廳被賊竄入旋卽收復并  
二次守城擊賊之實在情形也臣查署江藍廳同知卽補通判顏  
培肅前因粵賊滋擾一時疏於防範被賊竄入應卽撤任查辦惟  
該員於失守之後收集兵勇駐紮離城五里地方旋將廳城收復  
二次粵匪攻撲城垣又能守城殺賊功罪尙屬相抵應懇  
皇上天恩免其查辦以昭平允署額外劉貴奮勇捐軀請  
敕部照額外例賜卹惟查署中軍守備左哨千總賀炳翊當賊匪  
竄擾之時先日出城招募壯勇至十四日顏培肅收復廳城該千  
總尙未帶勇前來其爲藉詞巧避已無可疑應請  
旨革職以肅軍政謹附片陳明伏乞

聖鑒施行謹 奏

硃批另有旨欽此

咸豐五年正月二十六日內閣奉

上諭駱秉章奏江藍廳被賊竄入旋即收復并連次擊賊獲勝等語上年十月十二日廣西清水賊匪句結廣東連州之賊數千人竄逼湖南江藍廳城署同知卽補通判顏培肅調團固守并出城徑撲賊營另股賊匪潛從東北角梯城竄入顏培肅出至城外五里鋪紮營十四日募率壯勇奪回賊踞城外之福至嶺開礮向城轟擊圍丁繼至該匪棄城狂竄顏培肅率圍追殺百數十名生擒僞先鋒陳老五等十一名隨將廳城收復十二月初六日復有廣東賊匪分竄橫江沂村地方顏培肅調團分剿沂村賊卽遁走圍丁追殺多名橫江賊由南門竄撲城垣顏培肅督率兵勇守禦轟斃賊數十人額外韋鵬飛劉貴等兵練復從城外夾擊賊遂敗退

駱文忠奏稿卷二

六

我軍追殺五十餘名劉貴奮勇追殺落馬陣亡餘賊窮奔楚粵交界署江藍廳同知卽補通判顏培肅失守城池後旋即收復并能疊次守城殺賊功罪尙足相抵著加恩免其查辦署黃竹寨汛額外六品軍功劉貴奮勇捐軀著交部照額外例議卹署中軍守備千總賀炳翊當賊匪竄擾先期出城募勇及收復城池尙未帶勇到城顯係藉詞巧避賀炳翊著卽革職以示懲儆仍著該撫飭令該文武等實力防剿毋任楚粵交界餘匪蔓延欽此

湖南兵勇難以調撥赴黔片

咸豐五年正月初七日

再臣於上年十二月十五日承准軍機大臣字寄咸豐四年十二

月初四日奉

上諭據蔣爵遠奏黔省剿匪喫緊請敕湖南省就近撥兵協濟等語見在貴州遵義地方剿辦匪徒極爲緊要安南普安二城雖經收復而興義安順等處土匪竊發尙多黔省兵力難分必須鄰省派兵前往方足以資堵剿著駱秉章於近黔各營迅卽挑選兵勇一千餘名派委得力將弁統帶赴黔交蔣爵遠調遣務卽刻日起程毋稍遲誤將此由六百里加緊諭令知之欽此

臣查湖南一省官兵除調赴江南大營及東征水陸兩營外復遵

駱文忠奏稿卷二

七

旨撥赴一千名馳援廣東見在本省行伍空虛實屬無可派撥近黔之鎮筵綏靖各營弁兵軍輿數載調發頗煩見在存營兵丁多係由大營撤遣回伍疲乏不堪且漸染軍營惡習已久驕怯難用若勉強應調不但虛糜行裝鹽糧實爲可惜且恐零星雜湊貽誤匪輕見在本省南路防剿調兵僅止數百而鄉勇則多至數千永順與近黔各營壤地毗連見在徵調赴援亦係勇多兵少若使兵力可恃何須多調壯勇致多流弊此兵丁之無可調撥也至於壯勇之可用與否則專恃帶勇之人壯勇非如兵丁之久服營規頗難鈐束非得眞能帶勇之人令其自募自練俾其卒長相習未可深恃而人才難得求其能管帶千人足當一面者所見亦罕本省

南路見在帶勇各員臣亦嘗極意斟酌選擇而使然必謂其所向有功斷斷可恃臣亦未敢深信也黔民窮苦耐勞不乏可募之勇惟須慎選帶勇之人重以事權自可濟事臣前於胡林翼抵楚時卽畱心諮訪胡林翼極稱貴州文員韓超徐河清兩員人才實爲可用曾經指名奏調來楚該省奏畱未遣昨於邊界探稟中知該兩員見在軍中徐河清似亦曾獲勝仗想該撫臣亦知其材若能令其自募自練別將一軍不爲人所牽制委任而責其成功亦可期其得力臣於該兩員并未謀面不知其才略何如然既有所聞不敢不以入告謹因本省兵勇無可調撥一併據實陳明伏乞

聖鑒謹 奏

駱文忠奏稿卷二

八

硃批另有旨欽此

鄂省兵潰賊竄漢口大局頓壞見籌防勦摺

成豐五年正月二十二日

奏爲北省兵勇敗潰賊竄漢口大局頓壞見籌防勦情形恭摺由

驛奏祈

聖鑒事竊東征水陸兩軍自上年克復岳州後乘勝長驅所向克捷自田家鎮半面山水陸大勝後九江府城原可乘機克復因北岸廣濟黃梅賊勢尙盛北省兵勇不能得力塔齊布羅澤南等率諸軍繞渡北岸盡銳攻勦始克兩城賊以其暇得嚴密布置比塔齊布等回軍渡江則九江已屹然堅城難以遽下矣曾國藩偵湖口以內賊船甚多江西戰船均爲賊奪慮其出江爲害卽分軍勦之是時黃梅又爲安慶之賊所陷九江對岸小池口一帶復有賊

駱文忠奏稿卷二

九

蹤曾國藩水師老營無陸軍夾護每被岸賊驚擾而所有三板戰船又已盡入湖口被賊沈塞冬令水枯急切不復得出以致有十二月二十五日劫營之挫北岸之賊自復陷黃梅後兇燄復熾北軍不能抵禦二十七二十九兩日連次失利督臣楊霨駐軍廣濟賊至卽潰正月初三日已退至黃州適臣所遣解赴大營戰船水勇四百名行過武昌縣曾國藩所遣補用知府厲雲官亦於時繼至將率以前赴九江忽奉督臣札調令赴黃州堵禦比至則督臣又已退走初五日遂抵漢口矣督臣自武漢克復之後經曾國藩塔齊布等咨請入城非其本志其出也盡率兵勇萬餘以行武昌省會重地僅畱逃潰疲弱之兵數百飭藩司夏廷樾等居守撫臣

陶恩培到任甫數日一切未及布置當督臣退至漢口之時賊匪於初七日尾追而至人民以事出倉卒扶老挈幼號泣奔走情形極爲慘痛而督臣則又已不知退駐何處矣屬雲官方率戰船往下游中途遇升用道李孟羣相約回棹援鄂遂於初七日駛抵城外之鮎魚套次日調赴大營之湖南永州府知府張丞實亦奉曾國藩札率戰船駛赴武昌阻江爲守賊未敢偏湖北臬司胡林翼亦帶勇馳回救援倉卒之際皆未接據文報頃據平江縣稟云賊匪大股均聚踞興國州其犯鄂無疑鄂城餉竭兵空勢甚危急督臣所帶兵勇多已潰散湖北大局敗壞之速竟至於此曾國藩塔齊布糧臺坐船多被燒燬軍實蕩然勢難驟振見尚未接函咨未

略文忠奏稿卷二

十

知如何設措臣維湖北湖南水陸緊連勢同唇齒湖南本貧瘠之區又值兵燹之後東征之役官紳兵勇埽境以從軍火鹽糧悉索殆盡竭將士百戰之力甫將全楚肅清未及一旬大局復敗壞至此自去秋以來本省南路防剿兩粵之賊無日不事戒嚴搜除腹地之匪一時尙未就緒茲復值北路警報沓至時勢更非上年之比見一面抽調南路楚勇湘勇水勇赴省一面飭局趕造船礮一面飭北界各府州縣督飭鄉團悉力固守一面添募壯勇爲援剿之計一俟諸務稍集卽當相機辦理所有探聞北路賊勢情形謹由驛馳奏伏乞

皇上聖鑒訓示施行謹 奏

硃批知道了所造船廠仍應接濟曾國藩是爲至要欽此

駱文忠奏稿卷二

十一

後

請雷發遣革員帶勇效力片

咸豐五年正月二十二日

再臣前因保升副將周鳳山一營所募道勇自克復武漢後多有因傷病告假歸籍者其本籍道州亦不乏曾經戰陣之人上年十二月底調募四百名赴省見因北路警報紛來亟應調其援剿惟該勇僅只勇目保升把總何紹彩一員管帶未免勇多官少難資鈐束正躊躇間該勇以前署該州知州王揆一在任素得民心懇請歸其管帶臣查王揆一係因道州失守革職發往新疆效力贖罪之人經臣於上年奏雷廢員差委摺內將原案聲明請旨奉

上諭已革署道州知州王揆一於該州失守時率眾禦賊身受多

駱文忠奏稿卷二

三

傷經部議於斬罪上減等發往新疆效力贖罪已屬從輕王揆一著卽行發遣不准畱營欽此臣何敢再三瀆請自取愆尤顧帶勇與帶兵不同非素識其才藝性情斷難期其用命湖南見在所用各勇係揀選本地官弁紳士管帶故能稍收實效王揆一年壯耐苦委帶道勇可期將卒相習合無仰懇

皇上天恩俯念軍務需人甚急准將革員王揆一暫停發遣畱帶道勇以觀後效之處出自

聖裁理合附片具奏伏乞

聖鑒訓示施行謹奏

硃批王揆一獲罪甚大汝今又欲令其帶勇以觀後效預爲將來

保舉地步著不准行帶勇或武弁或紳士皆可亦何必須一革員  
耶欽此

駱文忠奏稿卷二

三

覆陳鄂督敗退武昌失守情形摺

咸豐五年三月二十九日

奏爲遵

旨覆奏事竊臣於三月十三日准兵部火票遞到軍機大臣字寄

咸豐五年三月初三日奉

上諭本日據楊需奏稱武昌省城於上月十七日失守巡撫陶恩培等力竭捐軀覽奏殊深憤懣見據楊需奏胡林翼王國才石清吉等兵勇約計雖有六七千人惟糧餉缺乏急須接濟川陝各餉尙未解到賊眾兵單金口南岸恐難駐紮若湖南就近可以接濟金口尙能駐紮則相機進剿若不能駐紮則設法渡江上扼漢川以固荆襄門戶等語著駱秉章悉心籌畫湖南兵勇儘有可抽撥卽當派委得力將弁管帶馳赴下游速爲援應所需糧餉就近設法接濟如或該省兵勇不敷抽撥而胡林翼等兵勇又復上扼漢川則金口一帶勢難兼顧恐逆匪乘虛上駛該省與湖北毗連在在可慮尤宜於南北交界處所水陸要隘加意嚴防毋得稍有疎懈將此由六百里加緊諭令知之欽此仰見我

皇上通籌大局宵旰憂勤之至意臣前此接准北撫臣陶恩培函

知鄂省情形卽籌撥餉項軍火并增募水勇千餘名配以戰船礮

械資以鹽糧飭赴鄂省又因胡林翼一軍甚單飭駐岳防守之守

備謀瓊林帶勇六百名及候補臬司魁聯於所帶楚寶各勇內抽

撥五百名赴鄂助剿均經奏明在案嗣因逆匪勾結興國通山等

縣賊匪竄擾崇陽通城分黨竄擾蒲圻窺伺南省之臨湘平江兩縣守備譔瓊林之勇未能卽進魁聯所帶之勇亦難以抽撥分擾蒲圻賊匪旋聚竄通城三月十六二十兩日賊匪八九千人進撲平江縣北界上塔市營盤經臣預派管帶平勇五品銜卽選知縣何忠駿李源濬卽選訓導黃崇策卽選從九黃錫宇守備銜千總方城等會合練勇團勇兩次奮擊斃賊三百餘名生擒三十餘名內有僞指揮田士林一名滿髮賊一名僞指揮徐大志執令旂長髮賊饒敦五礮尉楊至做僞先鋒楊時汰熊良鳳僞司馬僞兩司馬各一名立卽正法奪獲大礮五尊擡礮兩尊擡槍二十五杆烏槍五十八杆鉛彈九桶火藥十五桶黃馬褂二件刀矛黃巾旂幟

駱文忠奏稿卷二

五

不計其數賊匪敗後仍未遠竄見飭各界加意嚴防而催譔瓊林由臨湘星馳前進俟通城事定再添派勁旅赴鄂聽候胡林翼調遣北省水陸兩軍盼餉甚殷本省司庫早空無可接濟已撥兩道庫漕項銀一萬兩錢一萬串委永州府知府張丞實解往又代墊江西應解還湖北銀二萬兩委候補知府厲雲官解往并搭解軍火鍋帳等件凡水陸各勇由湖南赴鄂援剿者其口糧概由湖南支應合計解赴湖北款項已浮於督臣原咨三萬兩之數多矣但金口水陸各營每月需餉項六七萬之多湖南一省旣無從剗肉以醫瘡金口諸軍亦終難望梅而止渴應請

敕下湖廣督臣荊州將軍四川總督源源接濟俾武漢兩城迅速

克復則湖北之幸亦東南大局之幸也至督臣所慮金口不能駐紮胡林翼等應設法渡江上扼漢川以固荆襄門戶奉

諭著臣悉心籌畫臣思督臣始終堅執者防賊北竄四字以北竄

之患倍重於南可藉以爲詞耳防賊北竄不能不歸重荆襄荆襄者南方可由之以進窺陝豫北方可由之以窺關江楚自漢魏六朝以迄宋元皆以荆襄爲重鎮蓋當南北割裂彼此爭戰之時其計不得不出於此若以見在形勢言之則江西湖南兩省雖屢被賊竄形勢猶完湖北安徽兩省皆有重兵討賊勝負尙未可知設使湖北水陸兩軍移駐漢川則長江千里盡委之賊其將置東南於不顧乎曾國藩塔齊布水陸兩軍隔在江西前後皆賊聲息中

駱文忠奏稿卷二

六

斷在在可危更何有直擣金陵之望此臣之所未解者一也移駐漢川亦祇能禦上竄襄陽之賊其於荊州無足輕重逆賊水陸并進荊州門戶何存此臣之所未解者二也胡林翼等陸軍卽繞道上駐漢川水軍無所依附勢非退守監利之螺山岳州之南津港不可爲湖南門戶計尙未爲失然武漢黃各府豈可度外置之水軍旣去則武漢黃之克復無期此臣之所未解者三也督臣動謂賊眾兵單不思廣濟失利之初賊之前隊尾追督臣實不過千餘督臣麾下兵勇萬餘亦未爲少乃退黃州未一日卽退漢口退漢口一日卽退漢川由此而德安而隨州今且退至棗陽矣是北竄者賊也引賊北竄者誰乎督臣以餉絀爲詞此日之餉誠絀矣不

思自武漢克復之後督臣所用之餉不下二三十萬召募川楚無藉之徒臨時能得一割之用乎此輩散處民間姦淫擄掠無所不至洶洶之勢將何所底乃仍不知變計餉絀至此猶且隨意召募此臣之所未解者四也夫以形勢言之荊州據江水上游襄陽據漢水上游而武昌漢陽爲之鎖鑰是荆襄者中原之門戶而武漢者又荆襄之門戶也扼賊北竄必固荆襄欲保荆襄必守武漢此固一定之局督臣既知北竄爲重何以舍武漢不守而先顧荆襄既謂上扼漢川可以固守荆襄門戶何以舍漢川不顧而節節退走且胡林翼王國才等軍若不能克復漢陽又何能設法繞道以進扼漢川武漢黃德既均未克復胡林翼等縱能繞道而至漢川亦以孤軍而駐於四面皆賊之地又何能爲荆襄門戶計乎此臣之所未解者五也臣與督臣并未謀面亦未嘗共事一方本無夙嫌祇以大局關係匪輕若不據實直陳於心實爲不忍臣自蒙恩復任湖南巡撫以來須髮盡白咯血舊疾近益增劇僚屬紳民實所共睹雖值此時勢艱難萬不敢存乞休之想而自顧精力衰頹日甚一日職分應辦之事竭蹶不遑更何敢侈談大局特奉諭旨令臣悉心籌畫不得不披瀝愚忱是否有當伏乞

皇上聖鑒訓示謹 奏

硃批知道了汝所籌尙安惟議楊需失機各條實屬妄談居多該督固爲退縮有負朕恩尙不至如汝所言汝兩任南撫朕尙冀汝

有爲乃自陳衰老預爲歸息地步無恥已極欽此

駱文忠奏稿卷二

六

請

敕楊副將統領水師片

咸豐五年三月二十九日

再水陸官軍之得力全在將領之得人將領既得其人尤必士卒素相親附其部曲均齊心并力然後可殺賊而立功水師一軍之陷入湖口者銳卒多而統馭之才少曾國藩既親往整理可期復振軍威其在外江見扼金口者士卒冗雜而營官亦覺太多彼此分屬等夷勢不相下自應選派統領以資督率聞前湖北撫臣奏請以廣西升用道李孟羣統領各營該員素懷忠孝膽略甚優原可期其勝任惟臣嘗畱心體察水師一軍多湖南人李孟羣所帶廣勇除傷病散遣外存營者不過數百名向與湖南水勇不相親附統領雖無彼此之分士卒終不免睽疑之見恐臨時調遣不能

駱文忠奏稿卷二

九

得力臣查見因傷病告假回籍調理之總兵銜常德協副將楊載福忠勇善戰自湘潭大捷以後轉戰千里每戰輒單舸衝入賊隊所向無前其人廉明樸訥素爲軍心所附與見在金口水營記名知府彭玉麟彼此忠義相許最稱契合若以該兩員統領外江水師則各營官士卒情意交孚勇氣自倍該副將楊載福見經臣札調來省調養傷病就近商辦水師事宜令其趕緊招集部曲臣一面飭局紳修造戰船鑄製礮械俟該將病體小愈卽督率師船東下援剿如能重清江面與曾國藩湖口一軍會合則東南大局仍有轉機可否

敕令楊載福彭玉麟兩員統領外江水營仍歸曾國藩節制之處

伏候

聖裁至李孟羣所存廣勇人數無多應卽撤遣回籍該員籍隸河南光州前安徽撫臣江忠源奏調赴廬時原稱該員籍隸光固就近招募勁勇必可得力昨准曾國藩移鈔奏稿亦有請

敕袁甲三增募光固勁勇出勦蕪黃賊匪之議臣愚竊謂該員在廣西帶勇殺賊著有戰功原於陸路相宜廣勇既定議撤遣該員無須仍畱水營卽請

敕令回光州本籍勸捐募勇或與袁甲三合或自爲一軍江北可添一枝勁旅一轉移間水陸均可期其得力於大局似爲有裨是  
否有當伏候

駱文忠奏稿卷二

三

訓示施行謹 奏

硃批楊載福仍可飭令統率師船速赴武昌軍營餘所奏俱不准  
欽此

覆陳水師哨官乘亂搬搶餉銀片

成豐五年三月二十九日

再前奉

寄諭據曾國瀾塔齊布奏水營哨官乘亂搬搶銀兩請敕湖南巡撫嚴拏正法等語上年十二月二十五夜曾國藩等水營被賊匪用小划燒襲各戰船紛紛開動糧臺所雇之船無人看守右營哨官萬瑞書竟敢至糧臺空船搬搶銀兩嗣經永州府知府張承實在萬瑞書船上搜出銀一千一百餘兩之多當此軍需支絀之際該弁膽敢乘亂搶竊實屬目無法紀據奏該弁已於正月初二日開船上駛此時或在武漢或已回湖南均未可知著駱秉章迅派委員在水師營內及該弁湘陰原籍嚴拏萬瑞書到案即行正法

駱文忠奏稿卷二

三

毋令漏網等因欽此臣比密飭查拏旋據萬瑞書赴省投案據供上年十二月二十五日賊匪用小划燒襲大營時戰船均開駛搶護惟各營坐船及糧臺笨重之船倉卒不能撐駕被賊放火延燒軍功救火回來見有糧臺船隻錨纜已斷淌流江面無人管駕隨即上船看視見滿船載物狼籍中有皮包餉鞘并零星散銀一百餘兩恐爲賊得即令各勇搬回戰船因其時晝夜在船準備未敢輕離故未及隨時呈繳旋奉委員查點船礮當將搶護原銀繳出軍功若圖乘亂搬搶何敢停放船上等候搜查只求詳查實情聽候審辦等語臣當將該軍功飭司鎖押收禁一面密札各屬查拏乘亂搬搶銀錢潛逃歸籍之水勇已訪獲數起俟審錄供招起獲

贓物卽行正法以示懲儆見因總兵銜常德協副將楊載福前在九江受傷患病告假赴省調治臣當面詢一切據云上年水營被賊燒襲之時伊已因病後打仗受傷告假南歸該軍功萬瑞書是否搬搶糧臺銀兩無從知悉惟萬瑞書屢次打仗奮不顧身實所目覩臣以該軍功萬瑞書若果乘亂搬搶糧臺銀兩希圖入己固屬法所難寬雖平日打仗奮勇亦何能曲從原有惟據所供各情較之搬搶潛逃者形迹雖同情節稍異既據投案赴審是否遵旨正法抑解交曾國藩審明辦理伏候

聖裁謹覆奏請

旨

駱文忠奏稿卷二

硃批著解歸曾國藩軍營嚴訊欽此

三

廣東賊陷郴宜廣西賊陷東安衡陽武岡土匪乘機響應剿辦情

形摺

咸豐五年六月二十日

奏爲兩廣賊匪同時犯楚廣東之賊先後竄陷宜章郴州廣西之賊竄陷東安官軍攻剿互有勝負衡陽縣武岡州土匪乘機響應旋即撲滅見在籌辦情形恭摺由驛馳奏仰祈

聖鑒事竊廣東羣盜蜂起攻城掠野所在皆然自本年入春以來該省軍威漸振以次搜剿於是各路賊匪相率奔竄湖南三月二十一日及二十三等日湖南之桂陽廣東之仁化兩縣團紳孫承城劉廷英鄧國忠等會攻仁化踞城之賊擒斬僞知縣陳姓陣斬先鋒賊曾姓李姓等斃賊近千名收復仁化縣城僞大元帥曾佳

略文忠奏稿卷二

三

及賊目李芷香等帶傷逃匿桂陽縣境魚王山及仁化縣界之青雲坳署桂陽縣知縣吳清鵠督同團紳孫承城於四月初九日將曾佳等擒獲并起獲廣東賊目何祿等往來書信知廣東佛山蘆包白土中宿各處及三水英德清遠曲江樂昌乳源等縣賊將分起北竄帶勇委員趙啟玉由平石拔營十五日行抵廣東樂昌縣屬青草嶺謀先奪九峰之險扼之適樂昌賊首葛姓及鄧象王二潮陳受等率眾萬餘先夕已竄過九峰趙啟玉紮營未定郴州千總蕭紹鈴帶勇二百先往覘賊遇賊接仗小有斬獲被賊圍裏趙啟玉即派勇七百馳往援之其地羣山攢繞路徑分歧官軍且剿且進賊匪隨敗隨伏彌山徧嶺四望皆紅黃旂幟帶勇守備黃輔

鼎縱橫血戰身受十數創與蕭紹鈴奪路而出各勇尚未歸營賊已分路狂竄直逼趙啟玉營盤壓壘而陣趙啟玉守營壯勇僅數百名加以長夫及隨征團勇人數不過千餘趙啟玉督令輪流轟擊賊之逼近營牆者刀斫矛截斃賊甚多自十五日酉刻至十六日巳刻勢漸不支各弁勇強扶趙啟玉上馬衝殺潰圍而出趙啟玉厲聲叱之無何兩營被賊攻陷趙啟玉仍督勇裹創血戰手刃數賊壯氣彌厲忽賊噴筒四注火飛入營羣賊乘勢躍入趙啟玉身被數十創力戰陣亡參將李輔朝時在宜章聞警倍道馳援則賊眾重重圍逼已無及矣趙啟玉既全軍失利楚勇竄勇陣亡至數百之多郴州宜章各營聞之未免奪氣臣以賊勢方張飛調通

駱文忠奏稿卷二

十四

判周金城率南勇全軍由桂陽縣間道馳往援剿并以廣東韶關解圍調回援韶之署遊擊龍金源統帶辰沅五營兵千名由韶回郴州剿賊自攻破趙啟玉營盤後復向結韶州匪黨進犯宜章二十一日分股由三顰橋白石渡竄入卽補道王葆生所帶虎威勇李輔朝所帶楚廣各勇迎擊五退五進擒斬頗多賊殊死拒不退白沙巡檢謝德慶率團勇直前搏戰被賊叢矛攢刺陣亡團勇登時潰散各勇前聞趙啟玉一軍失利銳氣頓減此次見團勇潰散亦紛紛卻退王葆生李輔朝嚴督不止其由白石渡竄入一股參將積拉明阿署宜章縣知縣陳秀芝帶兵勇迎擊亦先勝後敗賊由五里冲會合襲陷縣城王葆生李輔朝率勇退保郴州適周金

城帶南勇自桂陽馳至軍聲復振偵賊將由大路徑撲郴州王葆生李輔朝周金城等預商派勇潛赴草鞋嶺一帶而以正兵從大路擲戰五月初三日李輔朝周金城出隊誘賊賊果蜂擁而來官軍詐敗引之入伏回旂截擊四路伏發斃賊近千陣斬偽元帥李勝侯珍及不知姓名賊目四名生擒百四十餘名內有偽右軍都督譚得勝一名先鋒旂頭十數名奪獲大小紅黃旂幟械簾牌刀矛無數賊仍退竄宜章初十日賊復分三路冒雨上竄李輔朝周金城率勇迎擊於五里亭斃賊六百餘名內有紅袍偽元帥二名生擒七十餘名內有紅袍女賊二名署郴州知州戚天保亦督勇協剿斃賊百餘名生擒三十餘名而賊之旂幟械簾牌奪獲

駱文忠奏稿卷二

五

殆盡賊以兩次痛剿潰敗不支遂分股一由黃茅嶺竄臨武而歸宜章一由間道竄撲嘉禾縣城其由黃茅嶺竄臨武縣境者戚天保及該署知縣盧肇煦督各鄉團沿途截殺斃賊千餘名賊首王二潮卽王義潮亦被擒斬賊首鄧象率賊匪數百由臨武竄出將入宜章署知縣陳秀芝會同參將積拉明阿帶兵勇督鄉團節節圍捕生擒鄧象及賊目歐玉等斃賊四百餘名餘賊逸至母老村圍勇圍殺殆盡其竄撲嘉禾縣城者知縣袁慧業汛弁陳佐清團紳李國榮嬰城固守七晝夜斃賊三百餘名適署桂陽州知州梅震榮帶勇援剿至縣賊遂解圍轉竄甯遠縣之魯觀洞黨夥散逸頗多見飭新田甯遠兩縣帶勇會剿此粵賊鄧象王二潮等由樂

昌九峰竄入攻陷趙啟王營盤後竄入宜章官軍屢剿獲勝首逆就擒伏誅餘匪竄逸之實在情形也李輔朝周金城兩軍正擬分股搜剿餘匪復接探報粵賊何祿陳森劉順昌等帶賊數千續由廣東乳源平石一帶竄入楚界沿途裹脅多人剿敗餘匪復陸續歸附勢甚猖獗臣查何祿係廣東上年起事賊目兇狡慣戰匪黨多東莞英德及惠潮之人愍不畏死密飭諸軍嚴加戒備十九日酉刻賊由摺嶺上竄王葆生李輔朝周金城等先派勇數隊伏於走馬嶺二十日辰刻大隊從中路迎剿賊眾開放洋礮傷我勇數名官軍屹立不動旋見籐牌悍賊飛奔而來南勇楚勇廣勇郴勇永勇直前格鬪立斃執旗先鋒賊數名籐牌賊數十正搏戰間伏

駱文忠奏稿卷二

五

勇四出或從後兜擊或從旁截殺賊陣始動忽北風大作賊眾施放噴筒毒燄反以自燔官軍乘勢蹙之勇氣百倍短兵相接立斃黃巾紅衣賊目十數名賊眾由小路奔潰官軍合隊窮追陣斬賊千餘割獲左耳九百六十餘隻奪獲洋礮十餘尊洋槍烏槍百三十餘杆擡槍七十餘杆籐牌噴筒鋼叉刀矛多件大小旂幟二百餘件兇鋒已挫矣而韶州以北各匪因廣東重兵把住韶關已絕歸路不得不冒死上竄民間喧傳廣東官軍有勦洗村莊之說山谷愚民亦多結隊奔赴湖南逆賊何祿等裹其壯丁脅之從逆以故人數更增王葆生等一面出示解散一面商議速剿二十三日分四路出隊擊賊於萬歲橋連踏賊營三座斃賊八百餘名賊首

僞水陸副元帥陳森策馬奔逃李輔朝率楚勇曹照古躡蹤緊追擒之桂陽勇鄧道輝鄧暄輝李海朝劉福林等衝入賊隊擒斬紅袍賊目一名訊之生賊卽賊中託言金陵首逆遣來句結之僞丞相陳姓也餘賊仍從大路回竄宜章是役所獲礮械旂幟帳棚軍裝實亦不計其數其時署遊擊龍金源帶辰沅五營兵一千名已由韶調回抵郴二十八日賊復來獅子嶺搦戰辰沅兵從中路迎擊鋒甫交而卽退周金城等分勇截殺斃賊百餘賊始敗走王葆生李輔朝周金城戚天保等會商賊匪屢經痛勦勢可一鼓殲除官軍當酷暑之時逐日出隊恐日久自疲不如乘勝大舉直搗賊巢迅復宜章一清邊圉三十日王葆生李輔朝周金城等率南勇

駱文忠奏稿卷二

三

廣勇楚勇全軍由獅子嶺大路進勦桂陽勇由東小路王仙橋繞出會合龍金源亦派辰沅兵在後接應南楚各勇行至五里亭適遇前隊籐牌賊突至南勇開放擡槍斃賊十餘名賊猶屹立不退官軍大隊踵至刀矛并舉直衝賊陣連斃執旂賊目數名始紛紛敗走官軍乘勝掩殺呼聲震天賊匪震懼莫知所措竟有跪伏道旁引領受刃者窮追四十餘里至良田首逆何祿見官軍追急持刀攔截敗匪折回抗拒楚廣各勇瞥見用矛猛刺正中其足籐牌賊趕至背負以走奪獲統領元帥大旂一杆僞印一顆良田巡檢鄭家姓亦由小路追至截殺賊數十名正擬午餐後乘勝徑撲宜章縣城忽送飯長夫飛報有青旂賊一股約千餘潛從西小路竄

入州城辰沅兵始不疑其爲賊倉卒未及准備遽行卻退王葆生  
李輔朝等疑信參半遂分軍扼住良田而帶勇馳回援救沿途屢  
遇城中長夫走報始知另股賊實已龔踞州城各勇腹飢不得食  
又恐兩面受敵遂紛紛退走是夜至窩鷄坪駐紮其分駐良田之  
勇聞警四路走散未能收隊宜章之賊聞已陸續竄入郴州臣接  
據各路稟報不勝詫異當派候選府經縣丞羅信南帶湘勇七百  
馳往應援仍飭王葆生周金城迅速招集散逸銳卒進剿一面分  
飭鄰近之永興耒陽興甯各令速將所撥練勇均歸李輔朝節制  
迅圖克復見計存營之勇及各路練勇已五千餘勇力尙不爲單  
辰沅五營兵丁全不得力卽撤遣歸伍以免貽誤嚴飭地方官及

駱文忠奏稿卷二

三

在事文武迅速戴罪圖功儻再有延誤情事卽據實嚴參治罪此  
粵逆何祿大股竄楚官軍屢獲勝仗同日尙獲大勝而州城旋失  
見籌克復之實在情形也廣西富川之賊前竄入湖南永明縣境  
經委員王鑫痛剿後逆首朱洪英等復竄踞廣西灌陽縣城句結  
兇悍賊黨及楚粵漏逸會匪結成死黨誓必北竄廣西文武約期  
會剿委員卽選知府王鑫率湘勇會之四月初四初五等日與賊  
接仗小有斬獲適廣西兵勇被賊劫營退回全州賊卽於初六夜  
空城潛竄時露蹤於道州近界之文村新圩一帶倏行倏止而大  
股潛從全州道州零陵交界之搖山翻山四竄越零陵縣境直撲  
東安縣署知縣賴史直請兵未到率勇出城迎擊眾寡不敵十六

日縣城失守王鑫周雲耀等率兵勇馳往援勦署永州鎮總兵朱瀚署永州府知府黃文琛會派已革都司駱元泰督帶兵勇繼至二十一日至白牙市會齊賴史直由蘆洪司率勇前來商議進勦二十二日周雲耀出中路王鑫賴史直等出左路駱元泰出右路均搜伏而進沿途斃賊頗多行至草鞋街遇賊二三千列陣抗拒王鑫督勇衝殺周雲耀駱元泰從旁環擊斃賊約三四百名生擒十餘名奪獲槍礮刀矛籐牌數百件乘勝直逼賊營兵勇奮勇直前連踏賊營四座賊敗退入城王鑫駐紮城外之孔明臺周雲耀駱元泰各駐左右高山相爲犄角距城不及一里正築壘間賊分大股直撲孔明臺王鑫督勇下擊賊卽暫退比收隊上山賊復回

駱文忠奏稿卷二

五

旂轉撲如是者數次并分撲周參將駱都司營盤皆經痛剿擊退是日鏖戰竟日兵勇亦有傷亡二十三日王鑫等誘賊出擊斃賊百餘追至城下轟斃執五色大旂紅衣賊目一名紅黃大旂賊目六名餘賊多名賊自是固匿城中不敢復出王鑫周雲耀駱元泰賴史直等銳意滅賊會督兵勇團勇日日合圍攻撲賊從城上開放槍礮子密如雨軍士肉薄攻城其勇銳者往往被槍礮傷亡賊之從全灌竄陷東安也先分遣賊目鄧照籠率賊二千餘由咸水東竄臣以逆賊旣直撲東安又預分一股東竄恐其乘虛由新甯縣直竄寶慶府則湖南上游一帶俱震飛飭署新甯縣知縣張士寬嚴防西延一路而札調新甯紳士五品銜江忠淑帶楚勇二千

赴東安會剿江忠淑未奉札之先已倉卒募楚勇千名前進適廣西亦遣千總趙慶祥等率兵勇數百越境會剿連日諸軍畢集直逼城下賊固匿不出間出隊誘我俟逼近城濠輒發礮石攻擊官軍雖小有斬獲未能痛剿二十八日賊出隊數百直撲廣西兵勇營盤湖南各營均派隊策應賊敗退入城趙慶祥等追殺多名二十九日各營俱約齊進攻賊預分股遏截北路兵勇而以驍賊撲燒全州兵勇營盤全州兵勇遂退楚勇先夕聞西延有警恐爲逆賊鄧照籠所襲勇心不固至是亦空營潰歸賊乃悉銳攻王鑫周雲耀駱元泰三營自午至戌併力鏖戰斬驍驚之賊百數十名賊始退卻王鑫等以逼城安營地勢高仰賊匪憑城開放槍礮勇士

駱文忠奏稿卷二

三

折損者多全州兵勇及楚勇又已退回恐勢孤難以攻擊不如僞退誘之遂於五月初一夜潛退井頭墟賊不敢追擊仍負嵎堅守適西延賊經守備蔣大勝擊退折回咸水江忠淑接奉前札仍選募勁勇二千於初十日由新甯前進臣復飭候選同知趙煥聯都司朱南桂守備張清和等挑募曾經戰陣之湘勇千名由省城馳往會剿并以衡州爲南路水道總匯之所飭守備王佐清帶水勇礮船前往駐防以壯南路聲援而杜兩粵賊匪水路窺伺之漸趙煥聯江忠淑先後行抵東安縣境王鑫等遂於二十二日拔營齊進東安縣城外五里安營二十七日卯刻賊二千餘分三路來撲王鑫等偵知賊蹤暗派兵勇布陣數里先搜伏賊正兵由中路迎

勦斃賊百餘其潛伏林莽各賊經官軍搜勦所殺亦多比近城邊賊於城上開放槍礮抵拒仍卽撤隊歸營是夜駱元泰及千總蔣榮華把總左光藻等帶勇潛襲淶埠頭賊營斃賊約百餘名蔣榮華生擒粵賊鄧穩等十餘名奪獲賊船二十七隻六月初一日王鑫等分三路繞城環擊賊匪出隊沿城抗拒官軍偏城攻擊斃賊二百餘此廣西逆賊攻陷東安縣城官軍圍攻屢獲勝仗尙未克復之實在情形也當東安失陷之時逆賊暗遣死黨潛赴衡永各屬肆行句煽四月十九日武岡州邵陽黔陽淑浦各縣連界之山門地方突有土匪嘯聚聲稱應援東安賊匪該處深山密箐向爲藏奸之所署武岡州知州任瑛聞警卽添募鄉勇督同團紳把總

駱文忠奏稿卷二

三

銜武生張玉台等密謀搜勦該州差役楊升自言機會可乘請多約心腹詐爲匪徒投入賊夥以圖之任瑛密遣其前往一面督勇前進楊升於二十三夜與其夥周光南等密謀伺賊熟睡將槍礮移置他所用水漬其火藥中夜賊營喊殺聲起賊出不意卽大驚擾昏黑之中自相格鬪楊升等合力奮擊殺斃匪黨多名周光南爲賊所害附近各團總楊兆南楊敦禮等聞喊聲大起知楊升之計已行卽帶勇爲之接應斃賊數十餘匪鼠竄二十四日黎明硤口巡檢陳燿源及帶勇紳士州同銜楊彤壽州同銜鄭邦封生員鄭邦岱等各帶練勇馳抵該處會督各團窮搜逸賊當將匪目尹祚第劉大五黃老八張起祖張文漢及匪黨八十二名就地正法

其竄邵陽澱浦黔陽者亦經各縣擒斬多名餘匪散逸見在嚴飭緝拏地方安謐如常五月十九日衡陽縣人陳得標等從賊中竄回該縣西鄉句結滋事當經署衡陽縣知縣馮汝棻調知拏獲正法匪黨分布洪羅廟渣江金蘭市一帶正在調碼糾人升任臬司文格飭馮汝棻及在籍都司曠益茂衡州協千總喻元發把總吳定發等管帶衡州兵勇及水勇星速馳往勦辦二十六日行抵妙山峰遇賊喻元發吳定發督兵勇轟擊斃賊數十生擒六名乘勝追至沙林塘興福寺斃賊百數十名生擒四名奪獲黃旂二面馬一匹吳定發同軍功廖效忠等追賊至金珠市槍斃執旂賊目一名奪獲太平龍鳳旂一面殺賊百餘是日四戰皆捷兵勇受傷僅

駱文忠奏稿卷二

三

止數名馮汝棻短衣草履身先士卒故弁勇踴躍用命該匪等自此次痛勦後卽各分途鼠竄不敢抗拒署湘鄉縣知縣唐逢辰聞警卽派紳士監生曾國潢生員朱蕙理問衙康景暉武生李長鑑及胡連王明倫王志賓監生曾國華等各帶團勇分赴衡陽衡山各界協勦擒斬多名管帶衡勇在籍前貴州荔波縣知縣魏承祝帶勇在洪羅廟一帶搜查餘匪勒令戶首緝獻所有此案首從各犯王蒲栗子梁維谷沈汝義王朝斌等八十餘名均經兵勇團紳先後拏獲及戶長網送審明正法地方安謐如常此武岡州衡陽縣通賊滋事土匪迅速勦除之實在情形也臣維廣東之賊竄陷郴宜屢經官軍擊敗擒斬至數千名之多兇悍賊目殲除實已不

少卽據各營所奪獲礮械軍裝除雷營備用外其先後解省呈驗者臣皆一一點視籐牌一項亦多至三百數十面是知官軍屢次攻剿不爲不力乃一起未滅一起旋來宜章尙未克復郴州復又失守頃據臨武縣稟廣東賊匪復竄撲城池桂陽縣亦報交界之文明司一帶亦有廣賊竄入每起人數動以萬計所獲賊中旂幟多佛山蘆包三水中宿白土惠潮清英等處地名是廣東北路之賊勢將全竄湖南在廣東雖有肅清之期在湖南何堪紛擾之害應請

旨速敕廣東督撫臣提臣嚴遏北竄以清其源并越境分剿以殺其勢庶兩省邊圉均有撤防之時而該省亦無回竄之慮至廣西

路文忠奏稿卷二

三

一省匪盜如毛漸成痠弛之證湖南永州寶慶兩府及靖州所屬防不勝防見竄陷東安一股陰鷲兇悍實與金陵巨賊無殊長髮紅巾蓄謀已久若不能聚而殲旃徒以驅賊出境爲事恐勢將滋蔓後益難圖臣見飭帶勇各員盡力攻剿期於殄滅淨盡無如武漢克復無期崇通賊勢復熾江西義甯又已告陷湖南北界東北界如岳州府屬之平江巴陵臨湘長沙府屬之湘陰瀏陽等縣在在堪虞剝牀以膚勢將漸及兵勇旣無可分布餉項又早已空虛後此情形殊難設想惟有殫盡血誠勉力支持以求稍紓

皇上宵旰憂勤之意至此次青草嶺陣亡之卽補同知直隸州知州趙啟玉以良吏帶勇殺賊屢著戰功血戰捐軀死事最烈伏懇

天恩照知府例賜卹白沙巡檢謝德慶殺賊陣亡請

敕部照例賜卹以慰忠魂而勵臣節其陣亡各弁勇團紳容臣查明彙案附奏所有宜章郴州東安失守之地方文武及在事出力貽誤各文武請俟事竣由臣核明功罪據實保劾以昭懲勸謹恭摺由驛馳奏伏乞

皇上聖鑒訓示施行謹 奏

硃批另有旨欽此

咸豐五年七月初一日內閣奉

上諭駱秉章奏兩廣賊匪竄擾湖南連陷宜章郴州東安官軍攻勦屢勝并將衡陽武岡土匪撲滅見在仍籌勦辦一摺湖南邊境

駱文忠奏稿卷二

書

與兩廣毗連廣東之賊經該省漸次搜勦餘匪奔竄經駱秉章飭令桂陽縣團紳會同廣東仁化縣紳勇進攻仁化踞城之賊殲斃千名收復縣城并將賊首曾佳等擒獲復有佛山等處匪徒勾結韶州賊黨攻撲委員趙啟玉營盤襲陷宜章縣城進撲郴州五月初三日卽補道王葆生等各勇分路截擊斃賊千名生擒百四十餘名初十日參將李輔朝等勇復迎擊斃賊六百餘名生擒七十餘名知州戚天保亦督勇協勦斃賊百餘名生擒三十餘名賊之旂幟器械奪獲殆盡賊勢不支分竄臨武嘉禾兩縣又經署知縣盧肇煦陳秀芝等勇截殺一千四百餘名知縣袁慧業等勇斃賊三百餘名突有賊首何祿等賊數千復由乳源一帶竄來王葆生

等率勇迎擊於走馬嶺等處殺賊一千八百餘名連踏賊營三座  
我軍乘勝直擣賊巢掩殺無算忽有另股之賊潛從小路竄入州  
城廣西之賊由全灌一路竄陷東安縣城委員王鑫等兵勇馳往  
援剿歷次斃賊百數十名或數百餘名不等并經襲破淶埠頭賊  
營斃賊百餘名奪獲賊船二十七隻其武岡州衡陽縣土匪乘機  
竊發亦經署知州任瑛署知縣馮汝棻等設法剿辦殲除殆盡兩  
廣匪徒竄越湖南滋擾著駱秉章嚴飭帶勇各員盡力攻剿力圖  
克復務將各股匪徒殲除淨盡毋任蔓延卽補同知直隸州知州  
趙啟玉帶勇殺賊血戰捐軀著照知府例議卹白沙巡檢謝德慶  
殺賊陣亡著照例議卹該部知道欽此

請調羅道一軍回湘防勦摺

成豐五年六月二十日

奏爲鄰氛四逼兵力不敷請調回湘勇一軍以資防勦事竊湖南一省南界兩廣西接貴州東距江西北連湖北見在廣東之賊竄陷郴宜廣西之賊竄陷東安本省南路永州寶慶兩府郴桂兩州所屬地方在在均急武漢旣未克復湖北興國州大冶武昌通山崇陽通城各州縣皆淪於賊縱橫數百里間土匪蜂屯蟻聚皆有長髮老賊爲之監督窺伺平江臨湘巴陵已久自江西義甯州失守以後賊黨積至數萬往來於江西湖北交界各處黃旂紅巾漫村徧野揚言誓竄湖南本省北路之巴陵臨湘平江三縣固已防不勝防而義甯州又與湖南之平江瀏陽各縣緊連東路之防又

賈文忠奏稿卷二

美

不可緩近復接據晃州廳各路邊報貴州鎮遠府台拱廳一帶痞匪勾結苗民滋擾西路又須戒嚴湖南一省廣輪千餘里南防兩廣北防湖北東防江西西防貴州以一省而兼支五省之寇卽盡調本省兵勇嚴行防勦尙恐分布難周非若他省專辦本地土匪及防勦一面可比況本省兵勇之稍精練者旣赴調江南安徽大營復隨曾國藩塔齊布東征近如署湖北撫臣胡林翼一軍亦多從本省召募是一省兵勇旣供四省調發又須防勦五省之賊其不敷分布情形諒邀

聖明洞鑒查見在隨赴江西之甯紹台道羅澤南湘勇一軍於克復弋陽廣信等府縣城池之後江西饒廣一帶業已肅清聞江西

撫臣陳啟邁見調其帶勇赴省此時江西客兵尙多而湖南情形較江西尤急相應請

旨敕下兵部侍郎銜曾國藩江西撫臣陳啟邁速飭羅澤南帶湘勇一軍折回湖南以資防剿庶於大局有裨臣一面飛咨曾國藩陳啟邁轉飭羅澤南帶勇問道回南以期迅速伏乞

聖鑒訓示施行謹 奏

硃批另有旨欽此

略文忠奏稿卷二

援粵辰沅兵丁回郴因餉缺退走片

咸豐五年六月二十日

再五月三十日郴城之失實因辰沅五營兵丁堵禦不力所致查是日南勇楚勇廣勇由中路追賊直過良田擒斬甚多逆首何祿帶傷逃逸正擬乘勢直擣宜城賊之預伏西小路者人數不過千餘度官軍空城追賊守禦必疏故徑薄州城爲暗襲之舉其實各勇追賊時署遊擊龍金源所帶五營弁兵千名并未派令出隊如肯悉力堵禦何難迅挫兇鋒乃見賊卽退以致州城失守前路得勝之師亦以退無所依紛然四散事機一誤遂至於此臣查辰沅五營兵丁向稱壯健然尙氣嗜利自昔已然上年八月經臣遵旨派往廣東救援惟時韶州與廣東省城道路中梗勢甚孤危該

駱文忠奏稿卷二

奏

兵丁自赴韶以來隨同防守及屢次奉調出城剿匪頗著微勞亦備嘗辛苦韶城軍餉匱竭不能支給口糧廣東提臣崑壽諭以俟省城道路疏通再行發給至本年五月十八日止據提臣崑壽來咨轉據龍金源等呈開積欠五營薪糧等銀共計約有四萬餘兩之多一時無從籌辦茲先發給五營銀六千五百兩其餘應找之項請查照例案先行找給咨明廣東督撫臣核明另行解回歸款該官兵等因該省餉道已通未能發給口糧又出征半載鍋帳軍裝多已朽敗無從請領未免心懷缺望二十五日回抵郴州二十八日出隊卽不肯向前三十日見伏賊突來卽紛紛退走不復如在韶時之出力是因口糧欠發遽爾灰心已可概見臣見飭署綏

靖鎮遊擊龍金源將所帶辰沅五營兵丁撤回歸伍一面飭其選  
派弁目每營一二名赴韶請領應得薪水鹽糧一面密訪實情分  
別從嚴辦理庶足以服兵心而申軍令謹據實附奏伏乞

聖鑒訓示謹 奏

硃批另有旨欽此

駱文忠奏稿卷二

咸豐五年七月初一日內閣奉

上諭駱秉章奏兩廣賊匪同時犯楚竄陷宜章等處請調回湘勇防剿并辰沅兵丁堵禦不力各摺片廣東賊匪竄入湖南境內宜章郴州先後被陷臨武桂陽等處亦有粵賊肆擾每股動以萬計是廣東北路之賊勢將全竄湖南廣西匪徒竄陷東安勢極兇悍雖楚省官兵攻剿疊有斬擒而賊勢蔓延兵勇不敷分布自係實在情形本日已諭令葉名琛柏貴勞崇光督飭兵勇合力兜圍毋令兩廣之賊全數竄入楚境并分撥官兵協剿宜章等處賊匪惟賊氛已甚猖獗亦不能專恃鄰封總須就湖南見有之兵力與兩粵官兵四面兜剿盡殲醜類郴城之失因辰沅五營兵丁欠發口糧見賊退走見已飭遊擊龍金源撤回歸伍著一面令派往韶州之弁目等將應得薪水口糧照數給發一面將首先退走之兵丁查明從嚴懲辦以肅軍律所請令羅澤南帶勇赴楚剿賊已諭令曾國藩等酌量情形辦理矣欽此

南北兩路剿賊獲勝摺

咸豐五年七月初九日

奏爲南北兩路剿賊獲勝恭摺由驛馳奏仰祈

聖鑒事竊逆賊自復陷武漢以後遣黨勾結湖北通山興國武昌大冶崇陽通城各州縣土匪刻思南犯經平江官軍團勇擊退之後敗賊仍據通城另股復自咸甯蒲圻前來會合候補臬司魁聯卽選道江忠濟分遣楚勇出境迎擊三月二十二日在通城花涼亭兩獲勝仗斃賊二百餘名生擒二十餘名二十七日賊眾大至分撲楚勇營盤于總江上曉等血戰竟日擊斃長髮賊目數名餘賊六七百名賊攻益急團勇先潰團紳職員李治續附生李文淳職員袁毓龍童生胡際昌王拱平李克靖監生余湘重等力戰陣

駱文忠奏稿卷二

望

亡該勇之勢益孤遂潰圍衝出陣亡百長林志祺及散勇二百餘名然此次楚勇雖云失利而所斃悍賊甚多逆賊亦不敢復萌窺伺之想由此舍通城而轉竄江西自武昌逆賊襲攻金口經署湖北撫臣胡林翼三次擊敗之後其僞丞相葛姓等率餘黨竄入崇陽沿途號召土匪仍踞通城江西義甯州賊又分股前來會合復竄擾通城北港一帶代理臨湘縣知縣姚榮卿帶團勇迎剿六月初八日遇賊接仗失利姚榮卿力戰陣亡逆賊分股屯聚通城巴陵交界之磨斗嶺通城臨湘交界之大界詹家橋等處意將由巴陵臨湘村僻小路直竄湘陰以撲省垣岳州官軍駐營鳳凰山原防通城蒲圻大路距小路遠或數十里百里勢難兼顧江忠濟前

派守備徐志近郭漢雲等帶勇馳赴巴陵縣毛田防剿探報二十四日賊匪分道由臨湘縣桃林竄及新牆江忠濟飛調徐志近郭漢雲等自毛田帶勇橫截賊匪南竄之路二十五日郭漢雲等帶勇行抵楊安橋遇賊數千蜂擁而來官軍攔頭迎擊斃騎馬賊目二名手執大黃旗賊六名陣斬長髮賊十四名短髮賊數十名奪獲擡槍五杆大小黃旗數十面賊始卻退分竄關王橋四六坊楊林街木瓜山等處二十九日委辦湘陰團練已革同知直隸州恩霖候選訓導毛英卓會商長樂各團紳等糾集團眾四萬餘人分途進攻關王橋之賊賊偵知團勇齊心聲勢浩大卽望風而潰僅燒斃賊匪數十名生擒八名燒燬營棚八十餘架適守備徐志近

駱文忠奏稿卷二

望

郭漢雲等追賊至花古園殺賊數十名追至港口殺賊百餘名奪獲賊馬五匹追至楊安橋柳木廠等處復殺賊數十名生擒執旂賊目柯正桃及長髮賊五名餘匪拋棄紅巾四竄初二日追賊至方山洞轟斃大旂賊目二名騎馬賊一名殺賊百餘名復追至橋頭黎樹坳殺賊數十名生擒十三名各路敗匪聞仍退歸詹家橋北港老巢臣聞北路警報當卽飭委守備銜千總楊虎臣軍功劉騰鴻等各帶湘勇五百名候選訓導丁際可帶靖勇五百六十名一赴大荆新牆一赴長樂團相機防剿比至而逆賊已敗遁此北路剿賊獲勝情形也廣東另股賊匪數千於六月初七日竄撲臨武縣城署臨武縣知縣盧肇煦署臨武營參將趙永年團紳在籍

前戶部郎中杜學禮及在城文武士民兵勇分門固守初八初九兩日賊匪攻城甚急城上槍礮火礮飛石齊下斃賊二百餘名奪獲長梯數十架自初十至十三日斃賊約二百餘名十四日盧肇照等派拔補把總周鳴謙募敢死士百餘縋城而下殺賊四五十名縱火焚燬賊據民房城上槍礮齊施斃賊匪數十名十五日該文武團紳等催調各鄉團勇齊至分兩路齊進城中兵勇齊出奮勇衝殺斃賊百餘名賊匪紛紛敗潰奪獲粵東英州總營統領水陸大元帥陳大紅旂一面大小旂數十面銅礮鐵礮各一尊擡槍烏槍籐牌刀矛多件乘勝追殺至宜章界之黃沙溪龍勝墟等處始行收隊計斃賊數百名生擒賊黃亞溪等二十八名重圍遂解

駱文忠奏稿卷二

聖

其由樂昌塘村竄擾桂陽縣文明司者六月十三日署知縣吳清鶴督團勇剿之於分界嶺陣斬二十四名槍礮轟斃者約十餘名賊退竄樂昌縣平石地方十三日大股賊數千復犯文明司肆行焚掠吳清鶴飛調東嶺團勇二千餘名馳往救援時已革都司王殿邦帶兵百名團紳范繼元何應興等帶練勇四百名西南二鄉團紳帶勇四百名合營百丈嶺賊匪悉力圍攻已數日矣二十日該兵勇等出賊不意奮勇衝殺下山百長范香賢首先躍入賊隊持刀亂斫兵勇繼之陣斬賊匪三百餘名內有乘騎賊目一名騎馬賊七名生擒黃壽奴等二十一名適滁口司巡檢萬立錢署知縣吳清鶴帶勇先後繼至賊奔甌頭隘二十三日吳清鶴飛調延

壽大盈團紳陳達元等齊圍速勒并飭東嶺團紳已保藍翎訓導  
劉廷英等從九峰前進四面環擊斃賊四百餘名生擒賊目譚昌  
福白占魁女賊甘李氏等十六名賊仍退竄廣東仁化縣境此南  
路勦賊獲勝情形也見據署宜章縣知縣陳秀芝宜章營參將積  
拉明阿稟報已會督團紳將縣城收復而郴州踞城之賊於六月  
十七十九兩日經參將李輔朝等三路進勦署安仁縣知縣李逢  
春千總田興恕從九陳鈞和等督勇衝殺共斃悍賊三百餘名該  
逆見屯聚郴州尚未他竄臣前調桂陽縣東嶺團紳藍翎訓導劉  
廷英及劉廷楨等挑選勇丁千名赴郴會勦該紳等已將竄擾文  
明司巨股勦敗遵調赴郴并增募勇丁二千餘名前來頃據王葆

駱文忠奏稿卷二

四

生稟報該紳勇於六月三十日將逆賊之分踞首家洞一股分途  
圍勦斬馘數百名餘匪有潰入郴城者有潰竄四散者該紳等擬  
於七月初一日帶勇直赴郴城進勦李輔朝稟報七月初一日督  
領各勇進攻株木山并飛諭劉廷英等由首家洞進攻李輔朝督  
勇將陳家樓松山伏賊擊敗追至距郴州十五里之株木山連踏  
賊營三座劉廷英等於是日分三路進攻窩鷓坪之賊連踏賊營  
兩座殺賊甚多奪獲器械騾馬無數見擬徑攻郴城迅圖克復其  
東安據城之賊兇狡異常卽選知府王鑫參將周雲耀卽選同知  
趙煥聯都司朱南桂訓導江忠淑等自六月初六初十一十四  
等日分路攻勦每處殺賊百數十名或二百餘名不等由賊匪負

嶠堅守固匿不出該文武等設法誘擊所殺不多未能痛剿比官軍偪撲城垣則城上礮石如雨勇銳之士每被中傷據永州鎮府稟報前月二十五二十六二十八等日該文武等督勇進攻均獲勝仗而二十五日鏖戰尤苦與臣所接探報無殊尚未接據王鑫等稟報未敢率行入奏又據署桂陽州知州梅震榮稟該員帶勇赴極樂隘口防堵郴州賊匪前月十九日有游匪突入州城肆行劫掠而前此由嘉禾回竄魯觀洞之匪復乘機竄撲嘉禾縣城意圖會合桂陽州之匪臣因桂陽州與衡州府屬之耒陽常甯等縣切近亟應撥勇防剿當調卽選同知趙煥聯都司朱南桂等帶所募湘勇千名折回衡州就近進剿竊維湖南以一省兼支湖北江

駱文忠奏稿卷二

望

西廣東廣西之寇南北同時并急各處警報紛來兵勇不敷分布能先清一路然後可撤一路之防庶幾緩急得資調遣見飭南路管帶兵勇各文武迅速設法掃除以免牽制而杜蔓延至北路帶勇剿賊陣亡之代理臨湘縣事候補縣丞姚榮卿楚勇百長把總林志祺巴陵團紳職員李治續臨湘縣附生李文淳職員袁毓龍巴陵縣童生胡際昌臨湘縣童生王拱平李克靖監生余湘重應懇

天恩敕部照例賜卹以慰忠魂所有南北剿賊獲勝情形謹據實陳奏伏乞

皇上聖鑒訓示謹 奏

殊批另有旨欽此

咸豐五年七月十九日內閣奉

上諭駱秉章奏南北兩路剿賊獲勝情形一摺湖北通山等處逆匪被湖南兵勇擊退後仍踞通城意圖南竄經魁聯江忠濟分遣楚勇出境迎剿自三月二十二日至二十七日連獲勝仗先後斃賊二百餘名及六七百名不等賊已敗竄復有崇陽逆黨及江西義甯賊匪分股再踞通城并由臨湘小路竄及新牆經江忠濟派出之守備徐志近郭漢雲等迎擊於楊安橋陣斃賊目八名長髮賊十四名餘賊無數湘陰長樂團勇復會合四萬餘人分途進攻燬賊營棚八十餘架適徐志近等追剿之勇先後踵至自關王橋

駱文忠奏稿卷二

異

花古園連日乘勝追殺沿途斃賊每仗不下數百人比及駱秉章派勇馳至該匪已全數敗遁退歸老巢湖南北境邊防尙能堵禦著駱秉章卽飭江忠濟等激勵團勇分途堵剿將通城交界各處聚匪併力殲滅以固藩籬所有疊次接仗陣亡之代理臨湘縣知縣候補縣丞姚榮卿把總林志祺巴陵縣職員李治續童生胡際昌臨湘縣附生李文淳職員袁毓龍童生王拱平李克靖監生余湘重均著交部照例議卹以慰忠魂至廣東竄匪占踞郴州宜章後復有另股圍撲臨武縣城及桂陽縣之文明司地方六月初七至十五等日臨武官紳各督團勇攻守兼施斃賊五六百名賊眾敗潰遂乘勝追至宜章縣界斃賊數百臨武城圍頓解桂陽逆匪

亦於六月十三日至二十三日經該署縣吳清鵠等調集團勇練  
勇合營圍攻每日斃賊數百生擒男女賊目譚昌福等十六名賊  
仍敗竄廣東仁化縣境桂陽賊匪亦退其宜章縣城據奏業已收  
復郴州踞城之賊據奏連日分路進攻殺斃甚多該逆未敢分竄  
著駱秉章督飭參將李輔朝等迅速進攻力圖克復俾得次第掃  
除廓清南路其東安獲勝情形仍著查明具奏欽此

駱文忠奏稿卷二

七

覆陳永州防堵情形并查拏安福縣門丁片

咸豐五年七月初九日

再臣前承准軍機大臣字寄咸豐五年五月初七日奉

上諭翰林院侍讀周壽昌奏廣西餘匪逼近湖南永州一帶請添兵防剿一摺據稱廣西富川恭城等處與湖南永州府屬各州縣壤界毗連該處賊匪肆擾請飭候補知府王葆生候補縣丞周金城移兵屯紮永州以固湖南邊圉等語永州府爲湖南省西南門戶其界連廣西富川恭城等縣賊匪眾多自應實力堵剿惟界連廣東湖北等處逼近賊氛堵禦均關緊要王葆生等練勇得力似未便專注一隅以致別處空虛其應否移屯永州之處著駱秉章體察情形妥爲辦理仍須於永州一帶派員嚴密防範毋任該匪

駱文忠奏稿卷二

吳

入境潛相勾結并飭鄰境各地方設法解散脅從是爲至要另片奏湖南安福縣知縣薛湘縱容門丁駱福勒索捐輸解費加收耗羨經該撫查拏該縣匿不解交各情著駱秉章嚴密察訪如係官役通同舞弊卽著據實嚴參毋稍瞻徇原摺片均著鈔給閱看欽此臣維王葆生等所帶之勇卽係南勇經臣於上年春閒飭候補縣丞周金城招募近省一帶壯勇一千六百名操練四月而後成軍每月九次在臣署箭道較閱其技藝如刀矛鋼叉籐牌擡槍之類較爲嫺熟上年秋閒派赴郴桂一帶與參將李輔朝所帶楚勇防剿廣東連州各處匪徒屢獲勝仗因連州蕞事之後留匪繼作嗣又以廣東迤北一帶剿敗之匪相率犯楚本省郴桂一帶防不

勝防剿不勝剿此南勇一軍所以未能調赴永州之實在情形也五月三十日該南勇等與楚勇全軍合剿廣東竄入宜章之賊大獲勝仗正在乘勝追剿之時忽伏賊自西門小路襲踞州城該勇等冒暑追至中途前後受敵未及攜帶鍋帳竟日飢疲遂繞道四散紛紛北歸沿途招輯未能歸隊周金城以該勇等原係省城及近省之人非同省招輯勢不能齊亦遂趕緊赴省臣以該勇於郴州被伏賊襲踞之時尚獲大勝其潰散之故實因歸路被賊隔斷無從得食與敗潰之卒實有不同惟不於中途歸隊徑回省城則周金城之措置乖方實難辭咎當即將該通判周金城嚴加申飭摘去頂帶勒限三日整理隊伍聽候調遣見據周金城稟已一律

駱文忠奏稿卷二

完

整齊聽調容即察看各路情形酌量調遣責其後效儻再不知奮勉圖功即當嚴參治罪永州一帶陸續調派即選知府王鑫江西補用知府劉長佑所帶湘勇楚勇及候補參將周雲耀所練之勇合計已近五千名一俟東安克復則勇力尙資分布至於解散脅從一事自宜相機籌辦臣前因各處稟報賊情有稱廣東竄來之匪其中有男婦老弱夾雜者臣慮係愚民畏剿逃竄或亦有良民被賊裹脅一時不能自明之事當飭王葆生製造良民免死牌票沿途散擲并出示曉諭資遣歸籍一面由臣咨會廣東督撫提臣并札駐韶之臬司沈棣輝一體分別安撫以孤賊勢但細察賊匪情形可解散者約有兩種愚民因誤聞該省有剿洗村莊之說畏

懼而來者此必須解散者也良民之被裹脅不得已而從賊者此可解散者也若頑犢悖逆之徒則嗜亂儼若性成不殺不止縱一時設法解散而若輩賊心不死官軍偶撤必復乘機思逞重煩兵力勢非大加芟薙斷不能望其革面革心臣惟有督飭在事各文武竭力剷除以求稍紓

宵旰憂勤之意至安福縣門丁駱福上年曾風聞有詐索薛姓捐輸解費之事當卽密札帶勇在禮之貴東道胡林翼就近嚴拏旋據胡林翼稟稱駱福因詐索未成事卽敗露卽夜逃走該令薛湘見出賞格嚴拏并請查拏該丁駱福家屬其無通同舞弊各情似尙可信臣於接奉

駱文忠奏稿卷二

辛

寄諭之後復札飭將駱福之弟駱鑑美查拏監禁勒交駱福到案研訊確情再行分別辦理斷不敢稍有瞻徇所有遵

旨覆奏各情謹附片陳明伏乞

皇上聖鑒訓示謹 奏

硃批知道了欽此

魁臬司屢次告病據實直陳摺

咸豐五年七月初九日

奏爲新放臬司屢次告病稟請回旂調理茲復續行請假恭摺據實直陳仰祈

聖鑒事竊候補臬司魁聯前在岳州府任內蒙恩簡放福建汀漳龍道欽奉

諭旨仍著暫畱湖南俟軍務完竣再行赴任嗣於本年正月二十三日欽奉

上諭湖南按察使著魁聯補授欽此該臬司魁聯忽於正月二十九日由岳州稟報到省臣比以逆賊竄陷漢陽湖北省城危急興國崇通土匪乘機句煽岳州防勦萬緊該臬司帶勇駐岳豈可遠離當飭其迅回岳州二月十二日復奉

駱文忠奏稿卷二

五

上諭升任廣西按察使文格著調補湖北按察使魁聯著作爲候補按察使另候簡用仍畱湖南辦理防勦事宜欽此五月二十九日忽據候補臬司魁聯稟稱本司生長北方慣歷風霜難經卑溼頻年染患痰飲氣喘病證醫治未痊二月十九日接武昌省城失陷之信氣憤填膺以致觸發舊證據醫云肝氣鬱結元氣過虧不早消導滋補必致轉入怔忡連日精神恍惚往往商畫軍情竟難明晰對答誠恐因患病稍有失機稟請據情代奏仰懇

皇上逾格恩施俯准回旂調理等情臣當批飭時局艱難正臣子殫誠竭力之日縱使衰病侵尋亦當勉效馳驅稍圖報效況該司

由候補知府甫一載擢至臬司又承

恩命畱辦防勦豈可因偶抱恙遽懇歸休臨戎既無告病之條  
怔忡亦非顯然之病未便准其所請嗣該臬司魁聯復於六月十  
一日具稟仍懇察核原稟據情代奏并聲明將原帶及續招楚寶  
各勇共一千五百名歸駐防岳州之紳士卽選道江忠濟統帶臣  
復批飭該司奉

旨畱辦防勦岳州見在喫緊自萬無告病之理該司新承

恩眷時局又正值艱難亦非可告病之時且楚寶勇一千五百名  
均係該司所募驟易生手管帶非其所宜江忠濟一人管帶所募  
之勇二千餘名已恐照料難周岳州地勢平衍又非僅江忠濟一  
軍所能控扼該司如敢堅執不回不能不據實直陳請  
旨在臣愚昧之見原以岳州正當多事之秋該司係三品大員可  
資鎮壓不得不再三堅畱聽候具奏請

駱文忠奏稿卷二

五

旨乃六月二十一日復據該臬司稟稱仍請據情代奏并聲明發  
稟後卽起程赴省聽候查驗臣接閱之餘殊爲詫異該司於二十  
五日到省二十六日來見臣察其精神尙好步履如常痰喘係該  
臬司向日舊病亦非一時增劇當復以大義責之該司無詞可對  
惟連稱孤負

皇上天恩而已適三十日欽奉

上諭湖南按察使著魁聯補授欽此當卽恭錄行知旋據該臬司

魁聯復稟請據情代奏請

旨賞假一月一俟病痊卽照例詣

闕請

訓等因伏念該臬司以奉

旨畱辦防勦大員責任甚重兩次赴省皆未會接奉札調舉動自由迥非意料所及當此逆賊縱橫之時若人人引疾擅離防所大局何以支持既據該臬司屢請代奏前來臣不得不據實直陳請旨伏候

聖鑒訓示施行謹 奏

硃批另有旨欽此

駱文忠奏稿卷二

七

咸豐五年七月十九日內閣奉

上諭駱秉章奏臬司屢次告病請旨遵辦一摺新授湖南按察使魁聯係疊次降旨畱辦防勦之員該員帶勇駐紮岳州界連楚北防務正當喫緊乃輒以舊病時發屢向該撫稟請代奏回旂調理且兩次赴省不候札調擅離防所殊屬取巧魁聯著以知府降補仍畱於湖南差委以示薄懲而杜規避欽此  
咸豐五年七月十九日內閣奉

上諭湖南按察使著周起濱補授欽此

委員接帶魁臬司楚寶各勇并畱遊擊差委片

咸豐五年七月初九日

再新放臬司魁聯所募楚寶勇一千五百名向係該臬司管帶駐岳防剿該臬司於前月二十日告病赴省時將楚勇一千名交見在岳州帶勇卽選道江忠濟管帶其寶勇五百名交署岳州府知府曹源管帶臣思岳州府爲湖南門戶關係非輕見值賊匪縱橫出沒之時防剿萬緊江忠濟原帶楚勇已有二千二百餘名之多若再將魁聯所帶之勇千名歸其管帶誠恐一人照料難周難以得力且江忠濟遇有出境剿賊之時岳州老營乏員經理亦難放心查有永州府知府張丞實上年經兵部侍郎銜臣曾國藩調赴大營適因公來省臣詢其在沌口水師營中并無經手緊要事件

駱文忠奏稿卷二

奏

當卽委令前赴岳州接管魁聯募帶之勇會同江忠濟妥籌防剿以免貽誤又湖南軍務方殷武職乏員差遣查有安徽委護安徽撫臣江忠源靈柩來南之升用遊擊和寬年力正強曾經戰陣仰懇

天恩將該員卽畱湖南差委以資得力理合附片陳明伏乞

聖鑒訓示施行謹 奏

硃批和寬著畱於湖南差委欽此

北路賊敗退出境南路收復東安籌辦情形摺

咸豐五年八月闕日

奏爲北路疊獲勝仗賊已敗退出境南路東安疊獲勝仗收復城池見在籌辦郴桂一帶粵匪土匪情形由驛馳奏仰祈

聖鑒事竊湖南北拒湖北江西之賊南剿廣東廣西之賊兩路接仗情形節經疊次奏報在案七月初二日卽選道江忠濟所派帶勇守備郭漢雲徐志近等甫將巴陵縣方山洞橋頭黎樹坳等處賊匪擊敗出境忽報臨湘縣賴家坳地方來賊數千修築營壘初三日郭漢雲等率楚勇由小路掩至出賊不意賊卽駭走楚勇追逐數里殺賊二十餘名生擒二名奪賊馬一匹賊奔白水畝復築壘抗拒初五日郭漢雲等出隊追剿槍斃騎馬賊目二名執大旂賊三名餘賊十餘名賊伏匿不出郭漢雲等僞退誘之潛分隊設伏山梁左右以待賊遽傾巢追撲郭漢雲等麾旂回拒伏勇左右抄出賊後連踏賊營二座斃賊二百餘名生擒賊目楊正才等十二名奪賊馬三匹擡槍二杆烏槍十五杆大黃旂十二面軍械無數餘賊四散初六日探報湖北蒲圻縣羊樓司有僞丞相萬姓率長髮賊數千屯聚意將南竄萬姓賊目前自武昌竄出時卽與諸賊約先遣數股分道竄擾巴陵臨湘各鄉冀分岳州兵力而徐以悍賊由大路乘虛竄撲岳州大營適各股賊匪均經官軍擊敗潰走出境江忠濟卽飛調郭漢雲徐志近等帶勇自間道出平山鋪拒之初九日出隊進剿賊於羊樓街後紮大營兩座聞官軍至卽

率眾抗拒官軍奮勇迎擊槍斃騎馬賊目三名殺悍賊數十名割首級三十七顆生擒二名賊始卻退十二日郭漢雲等復分三路進剿賊亦分三路拒敵鏖戰兩時之久斃賊數十生擒李光明等三名賊回巢不出官軍亦以日暮收隊歸營酉刻賊忽傾巢大至圍偏營盤更番疊戰郭漢雲徐志近等督勇力拒是夜月明如晝鏖戰三時斃賊數百名亥刻賊始敗退楚勇受傷陣亡者亦至八十餘名之多遂拔營歸岳州江忠濟以退駐示弱仍飭進駐雲溪驛相機進剿賊以受創甚鉅疑畏不敢進偏旋復下竄股匪千餘尙踞蒲圻崇陽交界之白里畈十九日郭漢雲及千總陽振國等率勇越境往剿斃賊三百餘名生擒匪黨劉輝山等二十餘名餘

駱文忠奏稿卷二

五

匪紛紛散竄其由江西義甯州湖北通城窺伺平江北界東界者七月初六日有賊千餘屯聚通城之十里市初八日委帶平勇卽選知縣何忠駿黃榮及紳士黃崇篆陳勁青等率勇進剿賊望風潰走奪獲紅黃巾刀矛等件是日東界防堵龍門委帶平勇卽選知縣李原濬千總方城探知有賊千餘在交界之路口地方紮營卽帶勇分兩路直搗賊巢刀矛甫交賊卽奔潰僅截斃數十人生擒十四名軍前正法是日東界防堵小坳委帶練勇卽選知縣張岳齡探知有賊數千自盤石地方蜂擁前來率同團勇出隊迎擊斬執大黃旗賊目二名賊始卻退各勇乘勝繼進刀矛并舉斃賊百餘名割獲長髮首級二十八顆生擒長髮賊姜光才等三名奪

獲偽丞相項大黃旂二面偽冬官又副丞相萬大黃旂二面小黃旂數面擡槍烏槍刀矛二百餘件餘賊奔潰此北路勦賊獲勝之實在情形也廣西賊匪之竄踞東安縣城者六月二十二日分股至花橋擄掠知縣賴史直帶勇截擊斃賊十餘名奪賊馬二匹生擒逆賊唐開純等三名軍前正法二十五日卽選知府王鑫參將周雲耀會同江西補用知府劉長佑等誘賊出城擊斃八十餘名內有大旂賊目二名署臨武營千總汪廷富衝入賊隊爲飛子所中被賊戕亡二十六日賊出大隊陣於唐帽山伏賊數百於荷葉塘南面之賊直撲楚勇營盤劉長佑督勇抵拒王鑫等分股搜勦共斃賊百數十名賊仍敗退入城二十八日賊復撲楚勇營盤劉

略文忠奏稿卷二

七

長佑督勇擊退斃賊七十餘名各營派隊分數起奮力攻擊各斃賊數十名七月初三日賊復出數股分撲楚勇營盤王鑫周雲耀趙煥聯朱南桂賴史直等率勇抄殺各斃悍賊數十名內有執五色大旂賊目及大黃旂賊目數名劉長佑麾楚勇於各礮臺施放槍礮斃前隊悍賊甚多賊始敗退各營奮威追殺共斃賊二百餘名賊敗潰入城死拒官軍收隊歸營連日賊仍固匿不出初七夜丑刻王鑫周雲耀劉長佑賴史直等率勇潛往分路攻城前隊甫抵東門城根各勇循城疾走足踐瓦礫有聲爲賊所覺大聲狂譟礮石如雨官軍收隊徐回賊開門緊追官軍返旂奮擊斃賊一百餘名十一日賊潛派百餘人赴百花沖擄掠賴史直督舉人葉兆

蘭文生蔣筠唐楚翹等率勇截捕斃賊二十餘名生擒蔣世得等  
五名十二日賊眾二千餘分撲楚勇營盤并設伏周家嶺及河邊  
一帶劉長佑督勇抵拒并撥勇一布於營右山脊一伏營左五里  
牌王鑫偵知周家嶺伏賊頗多卽分勇由河邊進剿自率親勇繞  
出周家嶺前衝賊爲兩段分路緊追沿途槍擊矛刺斃賊甚多賊  
屍狼籍劉長佑潛令五里牌伏勇由營左橫衝而出營右山脊之  
勇亦從山嶺壓下殺賊七十餘名隊長李景剛斃大紅旂賊目一  
名周雲耀分勇兩路沿河進攻擊斃前隊悍賊數十名百長袁國  
興手刃賊目三名追至城邊槍斃執大旂賊目一名是戰各營共  
計斃賊三四百名受傷之賊不計其數自是益固匿不出十九日

駱文忠奏稿卷二

五

王鑫劉長佑周雲耀賴史直等率勇偪攻賊始分股數百出城抗  
拒官軍且戰且伏誘令離城稍遠突起搏戰斃賊百餘賊仍紛紛  
敗退王鑫督勇奮追將近城邊城內賊匪復出隊接應王鑫張左  
右翼擊之復斃賊數十名始行收隊二十一夜有賊二千由全州  
黃土井一帶竄入東安縣城二十二夜在南岸諸葛營山頂築立  
營壘一夕而就而附近東安之四里洞一帶均全州地界伏匪甚  
多小路處處可通王鑫等方稟請移咨廣西速定會剿之局頃接  
永州鎮守探稟二十四日王鑫等率勇接仗殺賊一百餘名二十  
七八等日均自黎明出隊攻剿至黃昏收隊殺賊尤多二十九日  
未刻始將縣城收復尙未接據王鑫等稟報未敢輕率入奏此攻

勦東安賊匪疊獲勝仗之實在情形也賊踞東安城時廣西賊匪時於全州北界之廟頭黃沙河一帶往來嘯聚爲賊聲援六月二十六日有賊二千餘從廟頭攻撲永州之石期市千總蔣榮華所帶之勇僅三百五十名因眾寡不敵堅閉卡門潛從石期市小巷整隊突出殺賊百餘生擒悍賊陳維志該匪潰走已革都司駱元泰派兵勇乘勝尾追復殺賊百餘奪獲五色大旗大紅大黃旗六杆籐牌刀矛擡礮烏槍百餘件次日賊大隊數千復至一股撲蔣榮華卡座一股圍駱元泰營盤勢甚猖獗蔣榮華率所部壯勇奮威衝殺決盪而出殺賊百餘賊眾辟易竟不敢迫遂併力圍攻駱元泰營盤正廩戰間蔣榮華復率勇衝入會合兵勇開柵出戰賊

駱文忠奏稿卷二

五

匪紛紛逃潰仍回竄全州宜鄉廟頭等處此又永州勦賊獲勝之實在情形也廣東賊匪之竄陷郴州者自七月初一日參將李輔朝攻克株木山賊營訓導劉廷英等攻克窩鷓坪賊營之後初二日李輔朝率楚勇湘勇等攻西門約劉廷英等率東嶺勇攻東門李輔朝帶勇甫至踞城五里之桂茅嶺賊匪亦分股出敵李輔朝督勇轟擊斃賊十餘名適南風大作賊匪噴筒火箭飛衝入陣各勇奮力堵殺頗有傷亡劉廷英是日爲另股賊匪所阻未及會攻李輔朝飭守備陳希昂率楚勇進攻東門被城上火毯輒石擊退旋折回夾擊斃賊三十餘名始行收隊初三日賊匪三路前來撲營李輔朝分起設伏以待賊至洞坑湖伏勇四起賊驚懼退走各

軍追殺至距城二里之百湖橋斃賊近百名生擒五名劉廷英等由鴉秀坪進攻東路之賊追殺至蘇仙橋斃賊百餘名賊仍回城拒守適郴州土匪頭目許功化在和平墟聚集匪徒千餘將乘虛下竄十二日李輔朝派何其英帶東嶺勇二百名曹福勝帶楚勇二百名密往掩捕斃賊數十名餘卽四散當將頭目許功化并先鋒陳亞三等拏獲回營審明正法是日郴城賊匪分股由桂茅嶺前來撲營李輔朝督勇分四路追勦槍斃先鋒賊目一名餘賊十餘名賊仍死拒不退各勇分支痛擊刀矛并進殺賊頗多自辰至午賊猶未退適何其英曹福勝等自和平墟勦賊歸營卽率勇橫衝入陣賊眾披靡始紛紛潰敗歸巢忽廣東另股匪徒由宜章竄

駱文忠奏稿卷二

李

入郴城而郴城土匪王大才桂陽州土匪李石保等又糾聚匪徒數千赴郴會合賊勢愈張十六日賊眾傾巢而出分數路攻撲楚勇湘勇營盤李輔朝督勇分支拒敵楚勇百長外委夏士舉湘勇百長藍翎外委胡首法力戰陣亡賊匪猛撲湘勇營盤東嶺勇助戰將賊擊退是戰斃賊僅數十名而楚勇廣勇湘勇之受傷陣亡者至四十餘名之多十八日辰刻賊復分五路由桂茅嶺黃茅嶺坡裏坪漢池塘前來撲營黃旂紅巾漫山遍野各勇因先日損傷頗多人無固志李輔朝以眾寡不敵又株木山地勢三面受敵難以駐紮遂退回永興臣前以賊勢猖獗由粵東竄楚者源源而來該處一帶土匪必將勾引爲北竄之謀李輔朝一軍只能堵其下

竄永興之路若賊竟由興甯與安仁鄱縣茶陵交界各間道下竄沿途各州縣無迎頭截勦之兵衡州長沙大局均爲震動當卽密札委帶湘勇卽選同知趙煥聯都司朱南桂守備張清和速從東安拔營回衡州馳赴安仁進勦以遏賊衝復調補用通判周金城率南勇全軍由醴陵攸縣安仁相機前進頃據補用道岳州府知府王葆生稟稱七月二十九日賊匪二千餘竄至龍王鋪擾及智冲當派虎威勇東嶺勇出隊往勦賊旋即退獲賊十六人訊稱粵匪頭目蕭發江月率悍賊將由安仁先赴下游餘匪繼至等語是夜賊復屯聚龍王鋪八月初一日辰刻賊由杉樹下地方猝至千總田興恕等正在督軍鏖戰間適趙煥聯朱南桂等帶湘勇行抵

駱文忠奏稿卷二

全

龍海塘卽出隊合擊斃悍賊二百餘名陣斬賊目五名奪獲籐牌擡槍鳥槍刀矛旂幟無數俟周金城南勇全軍繼至卽行會勦此勦辦郴州賊匪之實在情形也臣維北路武漢未能克復則北界賊勢旋撲旋起不獨岳州平江兩路防勦兵勇萬不能撤且武漢據長江上游爲兩省關鍵實亦天下要膂形勢所宜急爭臣前奏調浙江甯紹台道羅澤南回南助勦原欲藉以埽除北路羣醜寬湖南一面之防俾得併力南路兩粵匪徒以杜其響應之念且以湖北兵不可用勇單餉竭迄少成功非得勁勇數千持數月之糧悉力會勦斷難望其成功羅澤南克復義甯州城後與臣籌議意見相同正擬由義甯前赴通城崇陽勦辦餘寇以次會師武漢忽

接九江大營信知湖南提督臣塔齊布以忠憤致疾暴殞於軍兵部侍郎銜臣會國藩擬調羅澤南赴德安防剿此舉尙未能決頃據探報武昌以南各處賊匪嘯聚如故義甯敗竄之賊又復前往會合勢復猖獗則湖北湖南之憂殊未有艾也東安縣城雖云克復然此股賊匪兇狡異常全州灌陽富川一帶素爲其出沒之所若不能掃穴擒渠不久必仍滋他患廣西撫臣勞崇光雖屢有會剿之咨而全州兵勇未能出境想亦因軍儲匱竭不遑遠略之故見在王鑫周雲耀劉長佑必已相機追剿但賊去若遠勢亦鞭長莫及無可如何至於廣東賊匪之踞郴者人數日添而郴桂一帶土匪附和者亦復不少郴州東路雖經札調湘勇南勇前往以剿

駱文忠奏稿卷二

三

爲防而西路耒陽一帶路徑紛歧亦不可不預爲籌及臣見飭江西補用知府劉長佑挑選所部楚勇千餘自東安拔營由耒陽進剿一俟各勇齊集當可迅掃狂氛惟探聞由粵東竄楚之匪內有因上年被賊偪脅粵省查辦嚴緊懼罪逃生者亦有親屬畏累避匿來南者不爲分別查辦則誅之不可勝誅且適以堅其從逆之志臣已刊刻免死牌票交王葆生查明印給并委候補府經歷梁伯齡覓廣東客商之在楚者持諭前往分別解散以孤賊勢而速戎機此又見在通盤籌畫布置之實在情形也此次打仗陣亡之署臨武營千總事把總汪廷富湘勇營藍翎外委胡首法楚勇營外委夏士舉等伏懇

天恩敕部照例賜卹以慰忠魂所有各路接仗及見在籌辦情形  
謹恭摺由驛馳奏伏乞  
皇上聖鑒訓示謹 奏

賂文忠奏稿卷二

壹

李副將擅離防所請革職畱營效力片

咸豐五年八月闕日

再統帶楚勇廣勇副將銜補用參將李輔朝於七月十七日退回永興縣後單騎馳回省城二十二日赴臣衙門求見臣以郴州賊勢方張該參將擅自來省殊爲意外當飭藩臬兩司傳其查詢據該參將稟稱奉委帶勇剿賊曠日持久州城未復日切焦愁因勇力單薄口糧欠發一時愚昧將所帶各勇派防永興要隘暫交藍翎守備陳希昂等管帶星夜赴省面求指示機宜請領欠發口糧以免各勇藉口參將仍卽趕回防剿臣以該參將所稱勇力單薄口糧欠發各情原可稟請籌辦卽行間一切緊要機宜亦可於稟牘批示遵行無須赴省面求指授該參將以此擅離防所實屬糊塗當卽嚴飭摘去翎頂勒令卽日馳回永興行營聽候參辦一面由司籌湊餉銀五千兩委員吳經炳解赴永興點驗支放相應請旨將參將李輔朝暫行革職畱營效力以觀後效如再不能奮勉圖功卽當據實嚴參以肅軍令謹附片陳明請

旨

